

文学典

文學典第一百七卷

文學名家列傳九十五

明十七

王世貞

世懋
士騏

按明外史本傳世貞字元美太倉人兵部侍郎倬孫右都御史忬子也生有異稟書過目終身弗忘十五咏寶刀老宿皆賞異舉嘉靖二十六年進士年方十九好爲詩古文及官刑部主事入王宗沐李先芳吳維岳等詩社諸人多外遷又與李攀龍宗臣梁有譽徐中行吳國倫輩紹述何李排擊王唐名日益甚屢遷員外郎郎中奸人間姓者犯法錦衣都督陸炳匿諸家世貞搜得之炳介嚴嵩以請不許楊繼盛下吏時進湯藥其妻訟夫寃爲代草旣死復棺殮之嵩大恨吏部兩擬提學皆不用用爲青州兵備副使父忬以灤河失事嵩惡世貞搆忬于帝論死繫獄世貞解官奔赴與弟世懋日蒲伏嵩門涕泣求貸嵩忬持陰獄而時爲謾語以寬之兩人又日囚服跪道旁遮諸貴人輿搏頰乞救諸貴人畏嵩不敢言忬竟死西市兄弟哀號欲絕持喪歸皆蔬食三年不入內寢旣除服猶却冠帶苴履葛巾不赴宴會隆慶元年八月兄弟伏闕訟父寃言爲嵩所害大學士徐階左右之復忬官

世貞意不欲出會詔求直言疏陳法祖宗正殿名廣恩義寬禁例修典章推德意昭爵賞練兵實八事以應詔無何吏部用言官薦令以副使涖大名猶不欲出攀龍等以大義曉之乃就官遷浙江右參政山西按察使母憂歸服除補湖廣旋改廣西右布政使入爲太僕卿萬曆二年九月以右副都御史撫治鄭陽數條奏屯田戍守兵食事宜咸切大計有奸僧僞稱樂平王次子奉高皇帝御容金牒行游天下世貞曰宗籙不得出城而譸張如此必僞也捕訊之果僞遂服辜張居正枋國以世貞同年生有意引之世貞不甚親附所部荊州地震引京房占謂臣道太盛坤維不寧用以諷居正居正婦弟辱江陵令世貞論奏不少貸居正積不能堪會遷南京大理卿爲給事中楊節所劾卽取旨罷之後起應天府尹復被劾罷居正歿起南京刑部右侍郎辭疾不赴久之所善王錫爵秉政起南京兵部右侍郎先是世貞爲副都御史及大理卿應天尹與侍郎品皆正三世貞通理前倖得考滿蔭子比擢南京刑部尙書御史黃仁榮言世貞先被劾不當計倖據故事力爭世貞乃三疏移疾歸二十一年卒于家世貞始與李攀龍狎主文柄攀龍歿獨操其柄二十年才最高地望最顯聲華意氣籠蓋海內舉天下士大夫以及山人詞客衲子羽流莫不奔走門下片言褒賞聲價驟起自古文

人享隆名主風雅領袖人倫未有若世貞之盛者也其持論文必西漢詩必盛唐大曆以後書勿讀而藻飾太甚晚年攻者漸起世貞顧漸造平淡病亟時劉鳳往視見其手蘇子瞻集諷翫不置也世貞自號鳳洲又號弁洲山人其所與遊者大抵見其集中前五子篇則攀龍中行有譽國倫臣也後五子篇則南昌余曰德蒲圻魏裳歙汪道昆銅梁張佳引新蔡張九一也廣五子篇則崑山俞允文潯盧柟濮州李先芳孝豐吳維岳順德歐大任也續五子篇則陽曲王道行東明石星從化黎民表南昌朱多燿常熟趙用賢也末五子篇則京山李維楨鄞屠隆南樂魏允中蘭溪胡應麟也而用賢復與焉又作八哀篇紀同郡中老輩陸治彭年文嘉陳鏊陸師道黃姬水顧聖之錢穀作四十詠紀遠近交游皇甫汈莫如忠許邦才周天球沈明臣王祖嫡劉鳳張鳳翼朱多燿顧孟林殷都穆文熙劉黃裳張獻翼王穉登王叔承周弘禴沈思孝魏允貞喻均鄒迪光余翔張元凱張鳴鳳邢侗鄒觀光曹昌先徐益孫瞿汝稷顧紹芳朱器封黃廷綬徐桂王伯稠王衡汪道貫華善繼張九一梅鼎祚吳稼澄之屬然其所去取頗以好惡爲高下曰德字德甫佳引字肖甫九一字助甫世貞詩所謂吾黨有三甫也裳字順甫與曰德俱嘉靖二十九年進士曰德終福建副使裳終濟南知府九一嘉靖

三十二年進士終巡撫寧夏僉都御史佳引自有傳

世貞弟世懋字敬美嘉靖三十八年成進

士遭父憂父雪始選南京禮部主事歷陝西福建提學副使再遷太常少卿先世貞三年卒好學善詩文名亞其兄世貞力推引之以爲勝己攀龍道昆輩因稱爲小美 世貞子士驥字罔伯舉鄉

試第一登萬曆十七年進士終吏部員外郎亦能文

按王世貞藝苑卮言余十五時受易山陰

駱行簡先生一日有鬻刀者先生戲分韻教余詩余得漢字輒成句云少年醉舞洛陽街將軍血戰

黃沙漠先生大奇之曰子異日必以文鳴世是時畏家嚴未敢染指然時時取司馬班史李杜詩竊

讀之毋論盡解意欣然自媿快也十八舉鄉試乃問於篇什中得一二語合者又四年成進士隸事

大理山東李伯承煜煜有俊聲雅善余持論頗相上下明年爲刑部郎同舍郎吳峻伯王新甫袁履

善進余於社吳時稱前輩名文章家然每余一篇出未嘗不擊節稱善也亡何各用使事及遷去而

伯承者前已通余於于鱗又時時爲余言于鱗也久之始定交自是詩知大曆以前文知西京而上

矣已于鱗所善者布衣謝茂秦來已同舍郎徐子與梁公實來吏部郎宗子相來休沐則相與揚扆

冀於探作者之微蓋彬彬稱同調云而茂秦公實復又解去于鱗乃唱爲五子詩用以紀一時交游

之誼耳又明年而余使事竣還北于鱗守順德出茂秦登吳明卿又明年同舍郎余德甫來又明年戶部郎張肖甫來吟咏時流布人間或稱七子或稱八子吾曹實未嘗相標榜也而分宜氏當國自謂得旁採風雅權譏者間之眈眈虎視俱不免矣

按名山藏文苑記王世貞字元美晉王覽之後世爲浙人宋潛貢進士來家崑山之湖川遂爲太倉人祖倬父忬倬成化戊戌進士嚮然儒者富於經濟起家知縣累遷右副都御史整飭兵備兼巡撫順天等府禦虜馬蘭峪有功進兵部右侍郎忬嘉靖二年進士以行人授御史虜犯古北口忬按順天趨守通虜大來竟不能渡河西爲世宗所知特旨擢僉都御史三十一年命巡撫山東亡何倭寇浙直且侵閩中命提督軍務巡撫浙江兼轄福建忬倚俞大猷湯克寬爲將奏釋繫獄故將盧鏜尹鳳卒用破浙直閩中寇明年虜入大同殺將覆師世宗手敕忬左副都御史移撫之忬會宣府兵大破虜擢兵部右侍郎兼僉都御史已轉左兼副都御史移鎮薊遼擊敗把都兒之擁衆入犯者又擊敗犯遼東兵明年擊敗敵小王子又明年授兵偏裨剿江南倭有功四年坐敵入灤河奪一官尋以鹵敵馬畜過當復之四敗敵於遼東又二年敵大入犯走之明年大破遼左敵斬首八百餘級忬治邊屢有功自以受世廟特知不復媚事上左

右又不復修禮用事相嵩父子嵩父子恨忤久之最後授指按邊郎按邊郎奏忤不事事嵩擬旨責忤其後敵突過灤淺薄都城嵩客嗾御史論忤下獄世蕃削蠟牘所敘斬首敵八百餘級詆忤罪忤坐論死是爲嘉靖三十七年世貞幼稱聖童六七齡已能讀父書至數十萬言十五爲寶劍詩有奇句十八舉于鄉明年成進士則嘉靖二十六年也授刑部主事閉戶讀書與李攀龍諸子修詞賦之業過從無日夜相彈射復相稱誦動曰吾黨動曰我輩動曰我二三兄弟動曰海內動曰中原其聲華意氣睥睨諸公間至前無古人世貞雖與攀龍輩修詞賦之業乎其當官視中貴人錦衣帥幸用事者蔑如中貴人錦衣帥或有不得請求政府爲地亦不爲理相嵩才而欲致之意弗善也時有譏詆在酒杯口角閒語流聞嵩嵩謂世貞惡少年矣兵部郎楊繼盛論劾嵩下獄世貞納橐饘繼盛妻訟夫寃世貞爲定草繼盛被刑世貞往哭收殮之嵩乃大恨凡諸郎官有文譽者出爲提學使者爲美選吏部推世貞嵩格之得兵備青州青多盜世貞謂盜不在遠在左右左右掾吏是顛倒秘迂其行事不可端倪購重賞收募閭里輕俠少年用之青遂無盜始世貞至官山東諸公見謂文少歌賦奕飲爲俊舉而已旣見精嚴練事發奸隱如神明以爲趙子都之流也大加歎服聲聞京師相嵩父

忌益其父忬灤州少失事遂釀罪搆下獄矣此時世貞棄官走長安市與其弟儀制郎世懋叩闕請代輦上貴人語世貞曰此無益適趣乃公斃耳世貞世懋日囚服跪道傍遮諸柄人車搏顙請救諸柄人側目嵩無所敢言忬竟坐誅世貞號跣歸柩倚廬哀痛禪除猶苴履葛巾爲心喪居久之莊皇帝卽位赴闕訟冤言殺臣父非先帝意本相嵩父子不然何臣父効首功八百餘級不論論灤州虜小入至死伏惟陛下哀憐詔復忬官此時世貞稍通賓客論文字宴游山水間矣世貞爲圖曰弇州盛有水石花木之致客來見世貞者世貞皆款之弇園中不惟世貞之文名也而弇園亦名於天下南北臺省謂世貞父冤雪可官也吏部補世貞兵備大名世貞思痛不出應詔上八事寓書當路此八事也世貞所以報主矣若官世貞世貞死不敢官當路解而強之世貞出而世貞之友尙有尼世貞者世貞曰夫如是則仇君且也散勝崇伯子遷浙江參政治吳興三郡吳越新罹兵火供億繁興民不堪命世貞請汰內府內官大小監冗食及錦衣諸衛寄籍者事雖不行竟得改折漕糧十五萬三郡之人以爲此緣王使君遷山西按察使聞母病投牒歸中道得訃矣服除以薦補臬旋轄廣西一月入爲太僕卿擢都察院右副都御史督治鄭陽時相江陵張居正世貞同年也會楚地再震荆

州廬舍多壞世貞引京房占有臣道太盛語又嘗遺京貴人書言江陵浸淫耳目非社稷福其人泄之居正積不平數言於人然客有請世貞文壽居正父母與壽居正世貞復盛有所稱引至比居正父於衆父比居正母於稷姜嫄居正於世貞若忤若合手書不時至殊亦款款世人又謂世貞居正之人也稍遷南大理以人言改應天府尹歸此時居正遭父喪奪情起服吳中編修吳中行簡討趙用賢上疏論居正居正欲杖此兩人者學士王錫爵詣居正所責之忤居正歸世貞故與錫爵同里相善也亡何錫爵有女以守節蛻化其未化時感冥契立恬淡教門世貞悅之尊之曰曇陽大師拜爲弟子於是焚筆硯謝賓客與錫爵結廬合居戒食梵誦甚苦異時所嗜好古圖籍若三代彝鼎名墨酒鎗棄爲他人有悉不問於是言官希居正論錫爵世貞兩人者家居講張爲幻而一日用賢及門稱弟子而人又謂世貞非居正之人也世貞於文字其宿好久之終不能焚筆硯謝賓客又復應人求請復遊於酒人詞輩縉流羽侶間居正卒起南刑部侍郎改南兵部侍郎以三品考與官蔭一子時已遷南刑部尙書矣有言其嘗被劾不當得考者乞休歸而尋卒贈太子少保予祭葬當肅皇帝時海內文學知名士人人自標世貞最後起異才博學橫絕一世其所蒐獵子史百氏皆以意鎔

鍊翕然爲一家古今著述之富亡踰也其詩使事構體不嫌小出入要歸之元氣挾北海淳泓中無餽釘蹇促鑱刻深險之態其地望之高游道之廣聲力氣象能鼓舞翕張海內之豪俊以死名于其一家之學直千古不廢也客旣亡論酒人詞輩縉流羽侶日踵世貞門四方書問往往不絕其所饋入亦往往緣手散施咄嗟盡有時削牘薦人多者或致千金後生初學得世貞一言品題一面傾吐則或希聲傳影轉相引重蓋嘉靖之初王守仁以講學開門能鼓一世而從之而當世貞之身士人風尙大類其時客或故於廣衆坐中字世貞示親暱而黯者或陰持幕中嘖笑私語賣世貞世貞恩及人而人不知醉罵人而人反思之世貞語其子曰吾自束髮卽負大志旣舉進士有所見聞卽負大憤庚戌以後虜入都門卽負大慮己未以後家難作矣卽負大痛隆慶戊辰以後有所迫而不能守匹夫之節卽負大慚庚辰以後入於悟門悟前之謬也卽負大悔吾他無深嗜嗜讀書文及酒酒損吾德而幽澣之際亦復賴以活文章稍益吾身後而實小之且吾以酒得生以生得譏以文章得譽以譽得謗以譏謗得挫挫之與譏謗也蓋天所以憐我而我之所以自解於辟也世懋字敬美旣晚出游於其兄諸子間其爲文章稜稜有氣岸諸子命之曰小美仕至南太常少卿小美之爲仕

也好爲條教煩不至瑣曲暢物情而能因事爲功世貞子士騏亦舉進士仕吏部郎

按陳繼儒

見聞錄王世貞墓誌銘瑯琊大司寇王公卒訃聞上贈太子少保予祭二壇旋遣中書舍人視事賜金四百兩子主事士騏疏辭不允公法得專葬以哀思大司馬令耐于項涇賜域思質公墓昭位之次從遺志也公奉家諱凡所爲委蛇屈信欲有效于司馬公者海內士大夫或未必盡知而其後先出處之際當時徐文貞楊襄毅公皆爲動色勸勉至袁安節先生垂老且以冢宰薦公自代夫亦念王氏世受國恩宜以君父大義自裁余亦度公始終有不得不出者二方嚴氏炙手時其意欲引置公爲重數近而公數遠之終不能籠公而會楊椒山當論報密使人告急且以孤相托公馳騎屬座主王太常亟往營救而王以嚴氏客語泄公又爲楊夫人削稿請代上之尋椒山受辟之次日又出宣武門酌酒泣奠津遣嫠弱嚴氏微聞之意不樂而思質公又以沈青霞冤死北向唾罵不已遂以此中禍公亟奔燕中且行且躡沙垢覆面與弟敬美日夜扳車遮道哀籲甚楚已又扶喪車下潞河荒迷震眩死而復生再矣會莊皇帝奉遺詔嘉與天下更始公方病瘍羸瘠不能起匍匐至都門外匿跡蕭寺泣草上陳冤狀詔與故官而思質公之事始白所謂公之不得不出者一也思質公雖蒙

先皇帝昭雪然猶藁葬淺土撫按學使繼以卹典爲請而新鄭公與鄉衮構龔齟及茲事禮官惑于浮言勒令候議公日夜腐心切骨不敢復上陳請之疏適兩臺條列三吳便利并及遼左功狀下宗伯覆請賜兩祭全葬崇贈大司馬郁太夫人僅四品封亦兩與恩榮比時銜天子命焚黃墓上邦君大夫及賓客至者車騎如雲男女夾道擁觀以萬數公捧誦綸音感極而痛率子姓鴈行望闕九頓謝而至是思質公之事始大白所謂公之不得不出者二也公諱世貞字元美自十五詠寶刀詩師爲之避席旣弱冠舉丁未進士恥從柄臣道地竟不謁館試以刑曹郎與李于鱗諸子日相唱和名奪公卿間公又日坐公署剖決案牒所讞獄度得情輒手錄付吏趣書之各以輕重決遣不三日而畢自是銓部兩以督學擬公皆爲嵩沮又半歲遷青州兵備青多大俠巨盜探丸殺人有司不能制公身繫袴褶集強壯教之射甲飭保甲重懸購盜之賞又于州邑畫爲四方或八以義官統之盜當時捕獲者爲上逐而不出境獲者次之拒不能劫者又次之凡盜從其所起而不覺察者經其所過而夜巡不傳捕者罰釋盜而覺者立杖死撫臣丁公每謂人曰有王君在吾豈復有東顧憂哉則以詢公公曰凡捕盜者其才勇狡黠過盜一等者也吾嚴其詐害之禁而復事掣之彼袖手不爲我出

死力矣是縱盜也吾知賞其功而事姑息之則彼之毒民也甚于盜是益盜也第操縱不失術而已乃以其法行之期年盜遂解散而無何思質公之變作公解綬奔難還伏草土中幾十年嵩僂薦起大名公堅不欲赴以八事應詔陳言曰此可藉手以謝朝命矣因固辭不報乃勉起就官大名之俗凡婚者之將嫁也則其姻族相聚而共酒食之多者至匝月不止既嫁則婿家亦如之蓋一婚而中人之產去半也喪家之有喪也則姻族相聚而來奠食者費不貲蓋一喪而中人之產去半也公至定婚喪禮其俗至今守之大名為州邑十有一而真定三十餘以軍興論供輸則大名之與真定各平而是時大名闕飭兵使其治真定者復委十之六于大名曰大名饒而真定瘠公力爭曰爲真定者以饒瘠而槩之是以大名六而真定四使爲大名者以州邑之數而衡之則大名二而真定八今請無論郡論州縣可也論州縣亦不必大名與真定埒大約大名無下等真定無上等取大名之中者與真定之上者並賦而大名之上者與真定之下者各自爲賦衡之則大名尙不得四而真定六于是大名乃不果增居一年移浙江叅政公下車摘一二墨吏及巨室裁抑之吳興久雨郡富人故閉糴粟踴貴公首捐俸五十金郡縣長而下次之又募民入粟廩中給冠服旌其閭及冬報粟得三

萬石又疏乞改折臺使者不敢言而公得請十五萬石吳興之人賴以活者甚衆未幾自浙叅長晉
臬以郁太夫人憂去服未除薦補楚臬旋遷廣西轄未一月入領閩卿又八月以御史中丞節出鎮
鄖楚鄖故簡僻前中丞每臥而治之公爲糾劾貪縱咨訪將才刷軍政清屯田鄖中遂隱然爲重鎮
江陵方與公詬弗善也公意不自得解官歸久之補南大理又久之補應天府尹皆不赴適有太原
貞女立化事甚著公念家難後居常忽忽每思以空言消之而又緣此杜門謝交斷文字之役者數
年其後兩京臺省交薦起官刑曹侍郎但堅請予告而已又其後方以思質公卹典具疏陳謝而少
司馬之命下又以考績至淮揚而大司寇之命又下然公皆不得已一再應朝命非其志也公自尙
書郎荐歷卿長浮沈中外凡四十年其間條論封事皆天下大計而所至吏治精炯尤不可悉數最
奇者莫如青州治盜及楚中樂平王事都下盜劫繼師陸公炳索不得後濟南獲盜房四者妄承之
公曰狡賊欲緩死耳立訊曰若盜陸公耶曰然賊安在曰在請械某而取之曰若劫陸公何狀曰髯
而肥何衣曰衣朱而圍玉公大笑曰若未嘗識陸公陸公喪寧衣朱圍玉耶且實不髯而肥盜搏顰
大服部民雷齡以捕盜橫濰萊間海道宋君購之急而遁宋以屬公公欲掩取而微露其語于王尉

捕者還報又遁矣公陽曰置之又旬月而王尉獲他盜勝常公心知其爲齡力也忽屏左右召王尉
詰之曰若奈何匿雷齡往立堦下聞捕齡者汝耶王驚謝無所逃責願飛騎往俄捧齡至公曰女當
死然女能執所善某盜偕來女生矣而令王尉爲之日期果得盜公遂以還宋君而請寬之官校捕
七盜逸其二盜首妄報逸者姓名俄縛一人至稱冤公令置盜首庭下差遠而呼縛者踞堦上其足
躡緣絲履盜首數從後窺之公密呼一吏蒙縛者首同出而易其覆以入令盜首証之盜首不知其
易也卽指緣絲履曰此逸盜也公大笑曰爾乃以吾隸爲盜卽釋縛者去徐進道者好蓄養亡命而
以橫占妓女被訟捕之不報俄有令詰問曰進道勒兵反矣公偵之果然而故緩其獄令縛賊自効
會有李卿者進道密友也公召謂之汝交關進道應死能以進道來貸汝不然者死無日矣卿應命
去俄報進道飯某所矣公遣二十騎往取之而以一騎入營立散其黨亡譁者青人舉手加額曰吾
輩始帖枕矣鄭陽時驛以一紙報公有樂平王次子奉高皇帝御容金牒祝髮爲沙門行遊天下勅
郡縣盛爲供帳公曰藩王有宗正條錮城中不得出而譁張如此遣輕騎孟光化禁止之而邏其從
者李汝貴秦太兩人得狀蓋以御女術游藩邸間崇王賜以機輜紅杖所至懾守令而汝貴爲之翼

奏旨鞠之則平涼民賀祿也此數事摘發隱伏捷如神明其能聲日馳都下都人士聚而歎曰王弇州文而豪乃任吏耶公益自負強項如故而又性不能曲事權貴人往往骯髒守法故言者多附影憑聲而起嘉靖間陸炳方貴幸用事受巨璫指匿奸校閹某欲貸其死公搜炳家得之炳婉轉請脫既復因執政以請卒不許當時業無不側目公者已新鄭柄相國掌銓客輻輳集公獨引母疾乞休新鄭曰吾出而彼歸者何也是將臥而待遷乎不聽休而已有先伺高公旨中之者江陵初欲公處史局公謝唯唯江陵以爲有心遠已也荊州地震公引李固京房占臣道太盛坤維不寧又有譁辱邑令者王生江陵婦弟也公論奏不少貸又貽宗人書相公浸淫耳目之好非社稷福其人洩之江陵江陵積不能堪雖稍遷廷尉京兆以貌示用公而竟以浮言嗾公去大抵新鄭徧江陵橫其鋒鍛視分宜遠甚而公亦時起時躋其引避于繪弋之外者亦屢矣公生而美姿觀丰采玉立與客談笑覺溫秀之氣溢于眉目間語及古人忠孝節烈則又慷慨淋漓爲泣然罷酒在浙中修岳武穆于忠肅祠墓爲文以奠辭極悲壯南陽祠張睢陽及鐵尙書鉉在南都請崇文廟釐配享公嘗言曰吾讀書萬卷而未嘗從六經入每欲牽衣而窺廊廡之末則世人齷齪臯比招搖門戶而聚生徒者吾方

恥之吾雖未聞道然誦法一念迄死未嘗敢忘故其居喪也凡三年始茹葷御室凡十年始衣具冠
預燕會家無姬侍臧獲輩以百指亦無一人曉聲律者質庵公義田千畝公倍拓之又爲祠專祀晉
卽丘子始興文獻公而配以宋左司諫元學正公歲時伏臘率族人跪奠惟謹生平于故人兄弟白
首無間言好推于鱗而遜敬美尤不惜以齒牙筆札緩急人客或一歲數及門或一人迫得數十函
書或進而附公以成名名成而更立門戶且忍于詈公以示角公弗爲異也客至而復請者與如初
凡公之門其品遠近醜好幾盡八方而中間交態離合向背之故亦凡數百變公皆性安之彌成其
大而已公生于嘉靖某年月日卒于萬曆某年月日葬于某年月日公之先出瑯琊王氏自晉丞相
始興公導渡江而南世爲浙人後有崑山學正諱夢聲者因家于官而太倉之王自夢聲始又六世
而爲公大父質庵公倬仕至南京兵部侍郎倬生南都察院右都御史兼兵部侍郎贈尙書思質公
忬配郁夫人實生公又十歲而生敬美太常大司馬常命之曰吾聞東海有鳳麟洲而兄弟其庶乎
因署其讀書之室曰鳳洲然而天下獵其詩及談說公之聲力氣誼者至變國俗一時三尺童子少
知句讀皆更相稱字而以足不及門與口不道元美先生爲可恥故公之字至今獨著公且死碧瞳